

HIBRU **Zu mbal tuku waņe**

Gabat ande nu Zu mbal afu Yesus tuku son ŋginaig ta nane tuku waņe kuyarna te tugunu teņenmba.

Zu mbal afu Yesus tuku kume tuku saņgri tomba tiņginaig sulumba naņgine tukul maņau ambokok kusrekinaig. Kusrekinaig ta naņgine mbal afuņge piti sernaņginaig le nane maņ tukul kame ta dubikinaig. Taņanaig le Yesus dubiwanu gabat andeņge waņe te nane tuku wamdus te-tiwam tuku kuyarna.

Yesus nu ambokok maņau ŋakmba kumumba maņau kitek te-mayokna. Nu kumna sulumba nuņe ndarembi sine muskil nduiye kile-tidiņga siņgine pris gabat suņgo minit. Ta tuku nane maņau ambokok saņgri kugatok ta nduiye kusreka Yesus ndo dubiwaig ŋga nu waņe te kuyarna.

Kuate tuku Kiņo nu eņel kame liniņmba o mbolņge minit

¹ O buk Kuate nu maņau kise kiseumbi nuņe pasa tugusek tuan taņgo tuku miņge mbolņge kilemayokka minanu le sine tuku wa mbuņ kame nane isanu.

² Ismba minnaig le ma ma kugawam tuku ait te mbolņge nu nuņe Kiņo nuņe mbolņge nuņe pasa temayokmba sasina. Agaņ ndende ŋakmba nu wai mbolņge patikam tuku nu Kiņo nuņe pilna. Tugu mbolņge Kuate nu sakina le Kiņo nuņeņge kilke te temayokna.

³ Kuate tuku kilɲa nu minit tuku maɲau ɲakmba nuɲe Kiɲo nuɲe mbolɲge minig le kaɲgerkeg. Nale ndindo minik. Kiɲo nuɲeɲge pasa saɲgrinu sakate le agaɲ ndende ɲakmba naɲgine ma mbolɲge minmba kumumbi piroka minmba minig. Nuɲe Kiɲo taɲge taɲgo tuku une sauke suluna sulumba Kuate Sungo Ndindo nu tuku ndinam kumamɲge samba mbolɲge minyokina.

⁴ Taɲana le Kuate nuɲe Kiɲo nyu sungo temayokna le nu tuku nyu taɲge eɲel tuku nyu liniɲgina. Ta tuku nu nuɲe mironɲ mata eɲel kame ɲakmba liniɲgina.

⁵ Kuate nu nuɲe Kiɲo ta teɲenmba sana. Ne ye tuku Kiɲo. Kite ye ne tuku Mam mayok kinet ɲgina. *Mune 2.7*

Kuate nu eɲel ande taɲamba sa ndana. Nu maɲ nuɲe Kiɲo sana:

Ye ne tuku Mam mayok kaɲgit.

Ne ye tuku Kiɲo minamɲgat ɲga sana. *2 Samuel 7.14*

Nu eɲel ande taɲamba sa ndana.

⁶ Kuate nuɲe Kiɲo mulum kilke te mbolɲge temayokam bafuna sulumba nu nuɲe Kiɲo nuɲe tuku teɲenmba sakina.

Yiɲe eɲel kame, tane nu tuku nyu te-duɲga nu mbariɲap ɲgina. *Lo 32.43*

⁷ Kuate nu nuɲe eɲel kame tuku teɲenmba sakina. Yiɲe eɲel kame nane bubre taɲaɲ kile-mayokket. Yiɲe kukul mbal pa mane taɲaɲ kile-mayokket ɲgina. *Mune 104.44*

⁸ Nu nuɲe Kiɲo tuku pasa teɲenmba sakina. Ne Kuate. Ne nyu sungo ɲak naɲe mbal kulatka minmba minamɲgat. Kugawe nda.

Ne kumumbi naŋe gageu kulatkate.

⁹ Ne maŋau tinreknu ndo nzalinu ne maŋau ŋaigonu
 ŋakmba mbulmba pitaikate.

Ta tuku ye ne tuku Mbara naŋe mbal ŋgamukŋge ne
 sunḡomba make pilmba nyu sunḡo tinmba
 gare tinen ŋgina. *Mune 45.6*

¹⁰ Kuate nu nuŋe Kiŋo tuku maŋ teŋenmba sakina.
 Sunḡo, ne tugu mbolŋge kilke te-mayokna.
 Ne naŋe wai kuyarmbi samba pilna.

¹¹ Kilke samba ŋgisikamŋgaik ta ne taŋawe nda.
 Ne minmba minamŋgat.

Kilke samba tawi taŋaŋ urfu patika
 ŋaigonŋgamŋgaik.

¹² Taŋawaik le taŋgo nu tawi tumba filfilte taŋamba
 ne samba kilke filfilmba kile-sikamŋgat.

Nane tawi abonu kilmba tinḡig taŋaŋ ne samba
 kilke urfunu kile-sika maŋ abonu kile-
 mayokkamŋgat.

Nenḡe ndo mbilka kiseumba mayok kine nda.

Ne tuku yar mata kugawe nda. Ne minmba mi-
 namŋgat ŋgina. *Mune*
102.25

¹³ Kuate nu maŋ lato nuŋe Kiŋo sana:

Ne ye tuku ndinam kumam teŋge sanḡri ŋak
 minyok mina le ma ma yeŋge ne tuku ŋgueu
 mbal ŋakmba kile-ibenḡka ne tuku kupe kum-
 nemŋge patikamŋgit ŋgina. *Mune*
110.1

Nu eŋel ande pasa ta sa ndana.

¹⁴ Eŋel kame nane Kuate tuku pasa dubide tuku
 guwa ndo. Sine afu Kuatenḡe muskil kile-tidinḡam
 tuku mineḡ mbal nu nane kukulniḡgit le pro sine
 tursinḡig.

2

Kuate nu ndin mayenu te-mayokna

¹ Kuate tuku Kiṅo nu o mbolṅge minit tukunu sine nu tuku pasa mayenu isgeṅ ta ake wamwamka li ndaka kurauka likube. Sine taṅa ndabe ta sine waṅ taṅaṅ kundu mayenu limba fare fare kumba ka ṅgisikamṅgig.

² O buk Kuate nu eṅel kukulṅingina le nane Moses tukul tunaig ta son saṅgri ṅak. Siṅgine mbuṅ kame pasa ta lukanaig ta lafunu kumumbi tinaig.

³ Sine siṅgine muskil kile-tidiṅgam tuku pasa mayenu Sunṅonge te-mayokmba sakina le nane isnaig mbalṅge sine kubeu siṅginaig. Kile sine pasa mayenu te ake wamwamka likeg ta sine taṅamba ndo lafunu tamṅgig.

⁴ Kuate nu nuṅe pasa ta saṅgri pilemba wam yimyammbi nuṅe saṅgri kile-mayokka wam kitek ke likina. Nu nuṅe nzali dubimba Tukul Guwa tuku saṅgri yimyam niṅge likina.

⁵ Kilke kitek prowam tuku sakig ta kilke ta kulatkam tuku Kuate nu nuṅe eṅel madi ndaniṅgina.

⁶ Kuate tuku pasa mbolṅge ande nu teṅenmba kuyarna.

O Kuate, taṅgo nu ima le ne mara mara nu idus timba minit. Nu ima le ne nu turam tuku kulatkate.

⁷ Ne ait fagnu nu tumba eṅel kame kumnemṅge pilna.

Taṅana sulumba ne maṅ nu tumba te-mayokmba nyu sunṅo tuna.

⁸ Ne agaṅ ndende ṅakmba kilmba nu kumnemṅge patikina.

Mune 8.4-6

Tañamba Kuate nu agañ ndende ñakmba kilmba tañgo kumnemñge patikina. Agañ ande tañgoñge kulat ndakanu tañañ mine ndakate.

Son. Kile ait te mbolñge agañ ndende ñakmba tañgo kumnemñge minig le sine kañger ndakeg.

⁹ Kañger ndakeg ta Yesus kañgermba nu mbolñge kila pileg. Kuate nu tañgo ake sinañ make patika Yesus nu ñakmba tuku kumwa ñga nu tumba ait fagnu eñel kame kumnemñge pilna. Pilna le nu ñakmba tuku kumna sulumba nyu sungo pasa ñak mayok kina.

¹⁰ Kuate nu agañ ndende ñakmba kile-mayokkina. Ñakmba nu tuku nzali ndo dubiwam tuku minig. Nu tañgo gudommba nuñe kiño kame mayok ka nuñe kilña tugumñge minam tuku idusna sulumba nu kumumbi nane tuku muskil kile-tidingam tuku tañgo rar sungo tuna. Yesus nu rar ta mbolñge nu sine tuku gabat mayok ka sine tuku muskil kile-tidinge siñgit.

¹¹ Tañgo nane Kuate tuku mbal mayok kambim tuku ande nu atrau piro biyit ta nane nu ndoñ tugu ndindo. Ñakmba Kuate tuku minig. Ta tuku siñgine Sungo nu sine yabu ndaka yiñe maib kame ñga

¹² sine ndoñ minam tuku Mam nuñe teñenmba sana.

Mam Kuate, ye ne tuku nyu sungo ta yiñe maib kame ndoñ te-mayokmba saka minamñgit.

Ye nanñe mbal ñgamukñge munembi ne tuku nyu te-
duñgamñgit ñgina. *Mune*

22.2

¹³ Nu mañ kuyar ande mbolñge teñenmba sakina.

Kuate, ye ne tuku sanjri tomba tinjet ngina. *Aisaia 8.17*

Pasa ande mata tenemba.

Ye yiņe maib kame Kuatenge ye sina ta ndoņ minet ngina. *Aisaia 8.18*

¹⁴ Kuate nu Yesus tuna mbal nane ngarosu ŋak. Ta tuku Kristus nu sine taņan ngarosu ŋak mayok kina. Taņamba nu maņau ta dubimba nu kumna. Nu kumna ta tinğa kume tuku sanjri Satan te-ibenņa sulumba

¹⁵ sine kumam tuku kuru-kuruka mineg ta sine tuku muskil kile-tidiņa kuru kuru wam ta tukulna.

¹⁶ Nu eņel kame turkam tuku nde ndakina ta kilimok. Nu sine Abraham tuku tugu ŋakmba tur-siņgam tuku ndekina.

¹⁷ Ta tuku nu nuņe maib kame minig taņan mayok kina. Wam ta mbolņge ndo nu sine tuku pris suņgo mayok kambim kumuņ. Nu kumna sulumba nu Kuate tugumņge sine mapeka sine tuku atrau piro kumumbi biyit le Kuate nu sine tuku une sauka gilaingate.

¹⁸ Nu sine taņgo taņan mayok kina le Satan nu tagomba minna ta nu piti ta kamusna tukunu kile nu sine tago mbolņge mineg ta nu sine tursiņgam kumuņ.

3

Yesus nu Moses lite

¹ Tira kame, Kuatenge sine ŋakmba wikina le sine nu tuku kuasmbi ndindo mineg. Nu Yesus kukulna le nu sine tuku pris suņgo minit. Ta tuku siņgine wamdus ŋakmba Yesus ndo idus tibe.

² O buk Moses nu Kuate tuku mbal ngamuknge piro ke mayemba minna. Tanjamba ndo Yesus nu Kuatenge piro tuna ta nu piro ke mayena.

³ Nale arnej piro mayenaik ta Yesus nu Moses lite. Tanjo ande wande pilit ta sine wande tuku nyu te-du ndangeg. Sine tanjo tuku nyu te-dungeg.

⁴ Wande njakmba tanjonje patikade ta Kuate nu aganj njakmba tugu.

⁵ Moses nu piro tanjo ndo Kuate tuku mbal ngamuknge piro mayena. Kuate nu ngumnennga wam kile-mayokkina ta nu wam ta tuku saka minna.

⁶ Kristus nu Kuate tuku Kinjo minmba Kuate tuku mbal ngamuknge piro mayena. Nu mbal ta tuku tugu. Sine wamdus sangrinu pilmba singine Sunjo tuku pasa alonu tairnga minbe ta sine Kuate tuku mbal nu tuku wande tajan mineg.

Ngamungal kilba tukul ndakam tuku pasa

⁷ Sine Tukul Guwa tuku pasa ise mayebe. Nu tenemba sana.

Kile ait te mbolnge tane Kuate tuku pasa isig te

⁸ tanjine mbun Moses ndon ma baknu mbolnge minnaig tajan ngamungal tukulmba kilba tukul ndakap.

Nane ye tuku wamdus mukuknu te gubra pile sam tuku tago-tagonaig.

⁹ Nane yar 40 ye tuku piro sangrinu yimyam kanjerkumba

ta tuku nda idusmba ye tago-tagoyumba minnaig.

¹⁰ Ta tuku ye mbal ta tuku gubra tumba nane tuku tenemba saken. Nane tuku wamdus

tugusek kuga. Nane ye tuku maṅau katese ndade ṅgen.

11 Ye nane tuku gubra sunḡo tumba pasa sanḡrinumbi teṅenmba saken. Nane ye ndoṅ mabte nda ṅgen. *Mune 95.7-11*

Tukul Guwa nu taṅamba Kuate tuku miṅge pasa sakina.

12 Tira kame, tane riroṅ mayewap. Ande tane ṅgamuṅge wamdus tugusek kugatok minmba Ku-ate abo minmba minit nu talamba pitaiwikat.

13 Ki ait mindek taṅgine taṅgine muṅgu sanḡri pileniṅap. Tane kile abo ṅak minig ait mbolṅge maṅau ta kusre ndawap. Tane taṅa ndawap ta une maṅau taṅge tane didikuwa le taṅgine ṅgamuṅgal tukulkikat.

14 Ambonga sine Kristus wamdus ndindombi tigeṅ. Sine maṅau ta kusre ndamba taṅamba ndo minbe ta sine nu tugumuṅge gare ṅak minamṅgig.

15 Kuate tuku pasa wam ta tuku teṅenmba sakate. Kile ait te mbolṅge tane Kuate tuku pasa isig te taṅgine mbuṅ kame taṅaṅ ṅgamuṅgal tukulmba kilba tukul ndawap ṅga sakate. *Mune 95.7-11*

16 Tane idusap. Ima kate ṅgamuṅgal tukulmba kilba tukulnaig e? Moses nu nane ṅakmba kilmba Isip kusremba kinaig mbal ta.

17 Ima kate tuku Kuate nu yar 40 mbolṅge gubra tina e? Nane wam ṅaigonu ke lika ma baknu mbolṅge kume farnaig mbal ta.

18 Ima kate tuku Kuate nu pasa sanḡrimbi nane ye ndoṅ mabte nda ṅgina e? Nane nu tuku pasa ismba dubi ndanaig mbal ta.

19 Nane Kuate talamba nu kumuŋ kuga ŋga idus-naig tukunu nane nu ndoŋ mabte ndakinaig.

4

Kuate nu tanŋo ndoŋ mabtam tuku iduste

¹ Kuate nu tanŋo afu nu ndoŋ mabtam tuku pasa sanŋrinu pilna ta kile minit. Kuga ndate. Ta tuku sine kuru-kuruka kurau mayebe. Sine Kuate ndoŋ mabtam tuku wam lisingikat.

² Sine siŋgine mbuŋ kame buk minnaig taŋaŋ kile mata pasa mayenu iseg. Nane pasa mayenu ismba talakinaig tukunu pasa ta nane tur ndakina.

³⁻⁵ Sine nu tuku pasa ismba son ŋgeg mbal ndo Kuate ndoŋ mabta mineg. Kuate nu tugu mbolŋge agaŋ ndende ŋakmba kile-mayokka nuŋe piro ŋakmba sugluka mabtina. Kuate tuku pasa mbolŋge ande nu mara 7 tuku teŋenmba kuyarna. Kuate nu mara 7 mbolŋge nuŋe piro ŋakmba sugluka mabtina ŋga kuyarna. *Mulum Pasa*

2.2

Afu nu ndoŋ mabtam tuku Kuate nu sakina ta nane nu talamba pitainaig le nu nane tuku teŋenmba sakina.

Ye gubra suŋgo tumba pasa sanŋrinumbi teŋenmba saken: Nane ye ndoŋ mabte nda ŋga saken.

Mune 95.11

⁶ Pasa taŋge sine teŋenmba tumsingit. Kuate nu tanŋo ndoŋ mabtam tuku iduste. Nane ambonga Kuate tuku pasa mayenu isnaig mbal ta nane nu talamba nu ndoŋ mabte ndakinaig.

⁷ Ta tuku ŋgumneŋga Kuate nu tanŋo ndoŋ mabtam tuku ait ande te-mayokna ta kite ki ait noten. Ye

David tuku pasa buk satinḡit ta Kuate nu tenjenmba sakate.

Kile ki ait te mboḡḡe tane Kuate tuku pasa isig te ḡgamunḡal tukulmba kilba tukul ndawap ḡgate. *Mune 95.7-8*

Kuate ndoḡ mabteg wam kilke mbolok kuga

⁸ Yosua nu Israel mbal kilmba Kanan kilke mbol promba nane Kuate ndoḡ mabte ndakinaig. Nane taḡamba mabtinaig kande Kuate nu ḡgumneḡga maḡ mabtam tuku ait ande sa ndakina kande.

⁹ Kuate nu nuḡe piro ke suluna sulumba mabtina taḡamba ndo nuḡe mbal nu tugumḡge mabtamḡgaig.

¹⁰ Sine Kuate ndoḡ mabteg ta nu nuḡe piro sug-luka mabtina taḡamba ndo sine siḡgine piro tuku saḡgri kusremba Kuate tuku saḡgri tomba tiḡga mabteg.

¹¹ Sine taḡamba nu ndoḡ mabtam tuku wamdus saḡgrinu pilmba dirnaḡgube. Ande nu pasa mayenu ismba talakuwa ta nu siḡgine mbun kame taḡaḡ Kuate ndoḡ mabte nda.

¹² Kuate tuku miḡge pasa saḡgri ḡayo abo ḡak minmba minit. Pasa ta kame bagi agonu limba nu agok ḡayo. Nu taḡgo tuku ḡgamunḡal ndu-aseмба ka sinam nziḡge kilke mbolok maḡau samba mbolok maḡau ḡgamu fetka kilimok kile-mayokkate. Taḡgo tuku wamdus nzali kise kise kam idusde ta nu kiḡgeḡka kila minit.

¹³ Agaḡ ande Kuate am mboḡḡe kuirka minam kumuḡ kuga. Sine tuku wam ḡakmba nu am mboḡḡe mayokḡge minig. ḡgumneḡga nu sine pilesiḡguwa le sine ta son ḡgamḡgig.

Yesus nu sine tuku pris sungo

¹⁴ Singine pris sungo nu samba mbol kina sulumba kile Kuate tugumŋe minit. Nu Kuate tuku kiŋo nuŋe Yesus. Ta tuku pasa mayenu iseg te biye debe.

¹⁵ Singine pris sungo nu kilke te mbolŋe minmba tago ŋakmba nu mbolŋe pronaig ta nu mbar ndana. Tago mbolŋe sine sanjri kugatok ta nu kila pilna sulumba sine sinasiŋgit.

¹⁶ Ta tuku sine kuru kuru kugatok wamdus bulok Kuate tugum kab. Nu ake sinaŋ tanjo make patika turkam iduste. Sine nu tugum kab ta nu sine mapeka siŋgine piti ait mbolŋe tursiŋgit.

5

¹ Sine tanjo ŋgamukŋe tanjo afu atrau piro biyam tuku mayok kinig ta nane sine ŋakmba tuku Kuate am mbolŋe pirokade. Sine agaŋ afu Kuate tambim tuku niŋgeg le nane Kuate tuku patikade sulumba siŋgine une saukam tuku agaŋmor bale farmba atraukade.

² Pris mbal nane tanjo ndo nane sine tanaŋ mbar ŋak. Ta tuku nane katese ndade mbal mbarde mbal wamdus bafumbi kulatka piroka minig.

³ Pris mbal mbar ŋak tukunu nane tanjo tuku une saukam tuku agaŋmor bale farmba atraukade ta nanjine une tuku turmba atraukade.

⁴ Tanjo ande nu nuŋe wamdusmbi atrau piro biyam tuku nuŋe nyu te-mayokam kumuŋ kuga. Kuatenje madiniŋgit mbal ndo piro ta biyam kumuŋ. Abo abo nu Aron tanaŋba madina.

⁵ Kristus nu mata nuṅe wamdusmbi pris sunḡo mayok kambim tuku nu nuṅe nyu te-mayok ndana. Kuatenḡe Kristus nu piro ta kam tuku madina sulumba sana:

Ne ye tuku Kiṅo. Kite ye ne tuku Mam mayok kinet ṅgina. *Mune 2.7*

⁶ Kuate tuku kuyar pasa ande teṅenmba sakate. Ne Melkisedek taṅaṅ pris minmba minamṅgat ṅgate. *Mune 110.4*

⁷ Yesus nu kilke mbolok taṅgo minmba nuṅe kume mbolṅe Kuatenḡe nu tuku muskil te-tiwam kumuṅ ṅga Kuate yabaṅmba sunḡomba malmbika sarsarṅmba minna. Nu wamdus ndindo ṅak Kuate kumnemṅge minna le Kuate nu tuku yabaṅ pasa ta isna.

⁸ Yesus nu Kuate tuku Kiṅo ta nu mata piti sugo kamusna. Piti ta mbolṅe Kuate kumnemṅge minam tuku wam ta nu kila pile mayena.

⁹⁻¹⁰ Nu Kuate tuku nzali ndo dubimba piti kamusmba minna ma ma nu kumumbi mayok kina. Nu kumumbi mayok kina le Kuate nu nuṅe Kiṅo ta teṅenmba sana. Ne Melkisedek taṅaṅ pris sunḡo minmba minamṅgat ṅgina. Nu pris sunḡo mayok ka sine nu tuku pasa dubiweg mbal sine muskil kile-tidiṅga abo minmba minam tuku siṅgit.

Sine Kristus tuku wam ṅakmba kila pilmba sugokube

¹¹ Sine Melkisedek tuku wam afu gudommba satingam iduseḡ ta tane pasa isam tuku ṅgaro wasni ṅak pronaig tukunu sine tugunu ṅakmba tumtingam tuku piro kareṅkeḡ.

¹² Tane o buk Kuate tuku pasa isnaig ta kile tane nane afu tumningam tuku ta tane kumuṅ kuga.

Sine maŋ pasa ndui ta tugu patika tumtingam iduseg. Tane kiŋo dabro taŋaŋ amo ndo nyam kumuŋ. Tane nyamagaŋ kareŋ^{nu} nyam kumuŋ kuga.

¹³ Kiŋo dabro amo ndo nyumba minit taŋaŋ tane maŋau tiŋreknu katese ndamba mbirmbarmba minig.

¹⁴ Taŋgo sugoŋge ndo nyamagaŋ kareŋ^{nu} nyade. Nane mara mara maŋau tiŋreknu dubika wam magenu ŋaigonu pitik katesede sulumba wam magenu ta ndo dubikade.

6

¹ Sine Kristus tuku pasa amo suk ta buk ismba kila pilgeŋ tukunu kile sine nu tuku pasa nyamagaŋ kareŋ^{nu} suk ta isam tuku wamdus pilmba ka sugokube. Sine makek maŋ lato lato sigrika wande palmbim kumuŋ kuga. Sine buk wam kame alo kugatok dubikigeŋ ta kusreka ŋgamuŋgal biye mbilmba makek kareŋ^{nu} siriwanu taŋaŋ

² kule pisne maŋau e ko taŋgo mbolŋge wai patinu tuku maŋau sine kila pilgeŋ. Sine taŋgo kummba maŋ tiŋga e ko mbal ŋaigonu lafu ŋayonu tumba minmba minam tuku pasa ta mata sine buk kila pilgeŋ. Ta tuku kile sine pasa alo sugo ŋak isam tuku wamdus pilmba ka sugokube.

³ Kuate nuŋe ndin tumsinguwa ta sine ndin ta mbolŋge sugokamŋgig.

⁴ Nane afu Kristus tuku wam katese mayemba maŋ kusrewaig ta nane kile-luka kilam tuku ndin ande kaŋger ndaweg. Ta ndaŋam? Kuate tuku bulu taŋge nane tuku wamdus kilŋaŋgina. Kuate nu ake sinaŋ taŋgo make patikate wam ta naŋgine

wamdus sinamnge kamusnaig. Nane Tukul Guwa mata tinaig.

⁵ Nane Kuate tuku pasa ismba tagonaig ta mayenu nga idusnaig. Kilke kitek tuku sangri minmba minam tuku ta mata kamusnaig.

⁶ Nane Kristus tuku wam njakmba ta kila patika man kusrekuwaig ta nane Kuate tuku Kinjo ngumnemba nu tumba nangine waimbi lato man ail kazrai mbolnge dannganu sukde. Nane nu tuku nyu njayo silide le njakmba kangerde. Ta tuku nane ngamungal biye mbilam tuku ndin ande mine ndakate.

⁷ Tane kilke tuku manau kangerap. Mara mara sawe piymba kilke mbolnge ndekate ta kilke nu sawe tate sulumba tanjo tuku piro turka nyamagan magenu tingade ta Kuate nu kilke ta nyaro mayenu tuwit.

⁸ Kilke ande sawe tate sulumba anga najgonu prode ta kilke ta piro kugatok. Kuate nu kilke ta kasuram bafute. Ngumnenga nu kilke ta piyamngat.

⁹ Tira kame, sine tane pasa pitinu satimgig ta Kuate nu tane mbolnge tanjawe nda nga sine iduseg. Kuate nu tane tuku muskil kile-tidinge tinguwa le tane nu kangeramngaig.

¹⁰ Tane Kuate tuku kume purmba nu tuku mbal turka minig wam ta Kuate nu gilainge nda.

¹¹ Tane njakmba tanjine manau mayenu ta biye demba minap le ma ma wam tairnga minig ta alonu promba tane tumail pulutingamngat.

¹² Tane kanyumba ngaro wasni njak mine ndakap. Kuate nu tanjo mbolnge wam magenu kamngit nga sakina ta o buk nane afu nu kumun

nga ngamungal mukuk tairnga minnaig ma ma kile nane Kuate tugumnge kanjerkade. Tane nane tana minap.

¹³ O buk Kuate nu wam mayenu ande kam tuku Abraham sana ta nuje pasa sangri pilewam tuku Sunjo ande nu limba mine ndakina le nu nuje nyu tamba pasa sangri pilemba tenemba Abraham sana:

¹⁴ Ye Sunjo. Ye sinja ne mbolnge wam mayenu kamngit. Yenge ne tuku ndare te-tugewi le sunjokamngat nga Abraham sana le

¹⁵ nu ngamungal mukuk tairnga minna ma ma tina.

¹⁶ Sine tango singine pasa sangri pilewam tuku singine nyu tamba sa ndakeg. Singine mbara nu tuku nyumbi sine pasa sangri pileweg. Manau ta mbolnge ande nu sine tuku pasa pitaiwam kumun kuga.

¹⁷ Kuate nu nuje mbal mbolnge wam mayenu kam tuku sakina ta nu wamdus biye mbil ndamba sinja kamngat nga sine idusbe nga nu tango tuku manau dubimba nuje nyumbi nuje pasa sangri pilena.

¹⁸ Kuate nu pasa sakate ko nuje nyumbi sangri pilete wam ar ta mbilka kise mayok kine nda. Nu yabrikam kumun kuga. Sine afu Kuatenge tursinguwa nga kua ka nu tugum kineng mbal sine nu tuku pasa biye demba ngamungal mukuk alonu tairnga minbe nga nu wam armba te kilemayokkina. Nu nuje pasa sakina sulumba man nuje nyumbi sangri pilena.

¹⁹ Wam armba ta mbolnge sine nu tuku pasa alonu tairnga mineg mbal wan anga ndinkanu

tañan bike ndakeg. Singine anga ta samba mbolnge tukul tawi sinamnge Kuate tugumnge minit. Purkam kumuñ kuga.

²⁰ Yesus nu Melkisedek tañan pris sungo minmba nu ambonga sine tuku ndin wakeimba sinam kumba sinenu nga Kuate tumailamnge pris piro biymba minmba minit.

7

Melkisedek nu pris mbal ñakmba liningina

¹ Melkisedek nu taño sungo nyu ñak ma ande nyunu Salem kulatkina. Nu Kuate tuku pris minna. Mara ande Abraham taño sugo afu ndon kame bumba nu nane ñakmba kile-ibenka nu luka kumba ndinngge Melkisedek te-silikina le nu nyaro pasa tuna.

² Tanjana le nu Melkisedek nu taño sungo nga nuñe agañ ndende ñakmba mañgur 10 patika ande tumba nu tuna.

Melkisedek nyu tugunu ta Mañau Tinreknu tuku Gabat. Nu kulatkina ma Salem nyu tugunu ta Wamdus Bulok. Ta tuku nu mata wamdus bulok tuku gabat.

³ Melkisedek tuku ina mam nu tuku wa mbuñ kame tuku pasa ande ta tuku mine ndakate. Nu prona tuku tugu e ko kumna tuku tugu ta sine gilai. Nu wam ta kugatok tañan minna. Nu Kuate tuku Kiño tañan nu pris minmba minit.

⁴ Melkisedek nu siñka nyu sungo. Singine mbuñ sungo Abraham tuku wam kañgerap. Nu gabat afu ndon kame buna sulumba gabis agañ ndende kilna ta mañgur 10 patika ande tumba Melkisedek tuna.

⁵ Ngumnennga Levi tuku mbuᅇ afu atrau piro biyam tuku Kuatenᅇge madiningina. Nane atrau piro biynaig sulumba nanᅇine mbal tuku agaᅇ ndende maᅇgur 10 patika ande didika kilnaig. Nane nanᅇine mbal liniᅇginaig ta tuku kuga. Nane ᅇakmba Abraham tuku mbuᅇ. Nane Moses tuku tukul ande dubimba nanᅇine mbal tuku agaᅇ ndende kilnaig.

⁶ Melkisedek nu Levi tuku ndare kuga. Abraham nu agaᅇ ndende maᅇgur 10 patika ande tumba nu tuna le Melkisedek nu suᅇgo tukunu nu ndek yaimba kilna. Nu kilna sulumba nu Abraham nyaro pasa tuna. Abraham nu ake taᅇgo kuga. Kuate nu taᅇgo mbolᅇge wam mayewam idusna sulumba nu Abraham pasa mayenu ta tuna.

⁷ Ima nu suᅇgo? Taᅇgo nu nyaro pasa tuwit ta e ko nyaro pasa tate ta? Taᅇgo nu nyaro pasa tuwit nu suᅇgo. Ta tuku Melkisedek nu siᅇka Abraham lite.

⁸ Levi tuku mbuᅇ afu nanᅇine mbal tuku agaᅇ ndende maᅇgur ande kilnaig ta nane taᅇgo ndo ᅇakmba kume far sulunaig. Melkisedek nu Abraham tuku agaᅇ ndende maᅇgur ande kilna ta kuyar pasa nu tuku teᅇenmba sakate. Nu abo ᅇak minmba minit ᅇgate.

⁹⁻¹⁰ Melkisedek nu ndinᅇge Levi tuku mbuᅇ Abraham kaᅇgerna le ait ta mbolᅇge Levi kugatok ta nu mbuᅇ nuᅇe tuku fuᅇgul sinamᅇge minna. Abraham nu nuᅇe agaᅇ ndende maᅇgur 10 patika ande Melkisedek tuna ta nu nuᅇe ndare Levi tuku turmba Melkisedek tambinu taᅇaᅇ kina. Ta tuku kile Levi tuku mbuᅇ afu nanᅇine mbal tuku agaᅇ

ndende ndui ndui yaika kilig ta nane pris sunjo Melkisedek li ndade.

Yesus nu Aron lite

¹¹ Kuate nu Levi tuku tugu Aron tuku ndare nane pris piro biymba kulatkuwaig nga nu tukul manau tango pino dubiwam tuku te-mayokna. Nanjine piro ta mbolnge tango pino Kuate am mbolnge kumumbi mayok kinaig kande pris kitek ande mayok nda kina kande. Pris kitek mayok kina ta nu Aron tuku ndare kuga. Nu Melkisedek tana mayok kina.

¹² Pris kitek mayok kuwa ta tukul manau kitek turmba mayok kinit. Tukul ambokok kugate.

¹³ Pris kitek ye sakit ta nu Levi tuku tugu kuga. Nu Yuda tuku tugu. Yuda tuku mbun ande atrau mbain mbolnge atrau ndakina.

¹⁴ Singine Sunjo Yesus nu Yuda tuku tugu mbolnge prona wam ta sine njakmba kila. Moses nu atrau piro biyam tuku Israel mbal saningina ta nu Yuda tuku nyu te-mayok ndana. Ta tuku tukul manau ambokok sinamnge Yuda tuku tugu ande pris piro biyam kumun kuga.

¹⁵ Pris kitek Melkisedek tana mayok kina wam ta mbolnge sine kilimok kangereg. Manau kitek turmba mayok kina.

¹⁶ Yesus nu pris mayok kina ta tukul ande dubimba pris mayok nda kina. Nunje mbun ande pris piro biye ndakina. Nu abo njak minmba minam tuku nunje sangri tamba nu pris mayok ka piro ta tina.

¹⁷ Kuatenge nu tuku tenemba sakina. Ne Melkisedek tana pris minmba minamngat.

18-19 Ambokok maṅau ta gisleknu. Taṅgo pino tur ndakina. Tukul maṅau mbolṅge nane tiṅreknu mayok ndakinaig le Kuate nu maṅau ta te-sina. Kile maṅau kitek Yesus mbolṅge alonu tamṅgig ṅga tairṅga mineg maṅau ta kumuṅ. Sine nu mbolṅge kumumbi mayok ka Kuate tugum kineg.

20-21 Pris ambokok nane atrau piro biyam tuku Kuate nu sanṅgina ta nuṅe nyumbi pasa saṅgri pile ndana. Nu Yesus pris mayok kambim tuku sakina ta nu nuṅe nyumbi pasa ta saṅgri pilemba sana: Ye Sunṅo. Ye yiṅe pasa yiṅe nyumbi saṅgri pilemba saken. Ye wamdus mbilmba kisemba sake nda. Ne mara mara pris minmba minamṅgat ṅgina.

22 Kuate nuṅe pasa saṅgri pilemba nu Yesus pris minmba minam tuku pilna. Ta tuku nu pasa kitek Kuatenṅge katna ta kulatka minwa le alonu kugawe nda. Minmba minamṅgat. Ta tuku pasa kitek taṅge o buk Moses ndoṅ pasa katna ta lite.

23 Pris ambokok nane ṅakmba kume likinaig. Ta tuku nane lafu-lafuka pris piro biyamba minanu.

24 Yesus nu abo ṅak minmba minit tukunu nuṅe atrau piro kusrewe nda.

25 Nu mara mara abo minmba samba mbolṅge Kuate tugumṅge taṅgo tuku yabaṅmba minit. Nane afu nu tuku piro tuku saṅgri tomba tiṅga Kuate tugum kinig mbal nu nane tuku muskil kile-tidiṅga minit.

26 Yesus nu kumumbi sine tuku atrau piro biyit. Nu purfeṅnu. Mbar ande nu mbolṅge mine ndakate. Nu sine taṅgo taṅaṅ mine ndakate. Nu une kugatok. Kuatenṅge nu te-duṅga samba mbolṅge pilmba nyu sunṅo tuna.

²⁷ Pris ambokok nane mara mindek ambonga nangine une sauka ngumneŋga taŋgo pino tuku une saukam tuku agaŋmor bale farmba atraukanu ta Yesus nu taŋa ndana. Nu nuŋe ngarosu kumam tuku pilna le afuŋge nu balenaig le atraukam nduina. Not ndo.

²⁸ Tukul maŋau sinamŋge Kuate nu sine taŋgo une ŋak kilmba atrau piro biyam tuku patikina. Ngumneŋga nu pris kitek piro biyam tuku Kuate nu nuŋe nyumbi pasa sangri pilena ta nu nuŋe Kiŋo nuŋe pilna. Nuŋe Kiŋo ta nu purfeŋnu minmba nu pris suŋgo kumumbi mayok ka taŋamba minmba minit.

8

Yesus nu pasa kitek kulatkate

¹ Ye pasa ŋakmba sake likit ta tugunu teŋenmba. Siŋgine pris suŋgo Yesus nu samba mbolŋge Kuate tuku ndinam kumamŋge minyok minit.

² Nu samba mbolŋge Kuate tuku wande tugusek ta sinamŋge nuŋe atrau piro kumba minit. Wande ta Kuatenge pilna tuku. Taŋgonge pile ndakinaig.

³ Pris sugo nane agaŋ yimyam Kuate tumba agaŋmor kilmba bale farde. Nane atrau piro ta ke likam tuku pris nyu tinaig. Siŋgine pris suŋgo nu mata piro ta kam tuku nyu tina. Nu agaŋ ande Kuate atraukam kumuŋ.

⁴ Yesus nu kilke te mbolŋge minit kande nu atrau piro biye ndakate kande. Pris gudommba Moses tuku maŋau mbolŋge tukul dubimba agaŋ yimyam kilmba Kuate atrauka tuwig.

⁵ Kilke te mbolŋge atrau piro kade mbal nane samba mbolŋge piro tugusek ta tuku kanunu ndo

kade. Moses nu tawi wande palmbim bafuna le Kuate nu wam pagumba sana:

Ne isa. Ne buk tabe mbolnge minna le ye wande kanunu te-mayokmba tumnen tanjamba ndo pale ngina. *Kisim Bek 25.40*

⁶ Kuate nu alonu sungomba prowamngaig nga pasa kitek katna. Kile Kristus nu alonu ta kile-mayokkate. Pasa kitek tuku alonu sungokanu pasa ambokok lite. Ta tuku atrau piro Kuate nu Kristus tuna tanje pris mbal tuku piro ambokok mata lite.

⁷ Kuate nu Moses ndon pasa katna ta sinamnge tanjo pino kumumbi minnaig kande nu man pasa kitek kat ndana kande.

⁸ Kuate nu tukul pasa kumnemnge minnaig mbal nu nane ndon pasa njak minmba tenemba sakina.

Ye Sunjo, ye satinjamngit. Ait ande prowa le ye Israel mbal ndon Yuda mbal turmba pasa kitek sangrinu katamngit.

⁹ Ye o buk Israel mbal tuku mbun turka ndin te-mayoken le Isip kusremba kinaig ait mbolnge nane pasa sangrinu katen tanjamba kuga. Nane ye tuku pasa ta dubi maye ndamba kusrenaig le ye nane ngumneniŋgen.

¹⁰ Ye Sunjo ye satinjamngit. Ngumnennga ait kumunguwa le ye pasa kitek tenemba Israel mbal ndon katamngit. Ye yiŋe tukul pasa njakmba nane dubi magekam tuku nane tuku ngamungal sinamnge patike likamngit. Ye nane tuku Mbara Sunjo mini le nane yiŋe mbal minamngaig.

- 11 Nane nangine kilke tuma mbal nangine ndare Kuate tuku kila pilwaig nga manj tumninge nda.
 Nyu njak nyu kugatok mbal nane njakmba ait ta mbolnge ye kila minamngaig.
- 12 Ye nane mapeka nangine wam njagonu sauke ningamngit. Tanjawi sulumba ye nane tuku une njakmba gilaingamngit ngina. *Yeremia 31.31-34*
- 13 Kuate nu pasa kitek katam saka nu pasa ambokok te-sina le piro kugatok minit. Nu piro kugatok minmba ngisini bafute.

9

Kuate mbarinjam tuku kilke mbolok tawi wande

¹ Pasa ambonja Kuate nu Moses ndonj katna ta nane ta sinamnge fare fare Kuate mbarinj ndanaig. Nane tukul afu dubika nu mbarinjaig. Nane nu mbarinjam tuku kilke te mbolok tawi wande pilnaig.

² Nane wande tumailamnge bulu ande mbain mbolnge pilnaig. Tukul bret Kuate am mbolnge patikinaig tuku mata mbain ta mbolnge minnaig. Tawi wande ta nyunu tukul wande.

³ Tukul wande ta ngamunge malanja tukulanu tawi sunjokanu minna. Tawi ta ngumnemnge tawi ma ande minna ta nyunu tukul wande sunjo.

⁴ Wande ta sinamnge mbain ande aganj afu pasokanu le mundur magenu prowanu ta minna. Mbain ta nane golmbi wakeinaig. Kuate nu Israel mbal ndonj pasa katna ta tuku bokis mata minna. Nane ngaronu golmbi wakeinaig. Nname armba tukul pasa kuyaranu njak, gol waim mana fudinndo

ɲak, Aron tuku ndumndum kuzru prona ta ɲakmba bokis sinamɲge patikinaig.

⁵ Bokis mbolɲge eɲel armba wakeika patikinaig. Eɲel ar ta magenu ndo kilɲa ɲak. Nale nakile salmban kuitka bokis tukulnu songinaik. Kuate nu taɲgo tuku mbar saukam tuku pris suɲgo nu bokis tukulnu ta mbolɲge agaɲmor ndarenu bareɲanu. Sine kile tawi wande tuku agaɲ ndende ɲakmba satingam tuku ait kuga.

⁶ Nane taɲamba tawi wande tuku agaɲ ndende ɲakmba patike likinaig.

Pris mbal nane mara mara wande tumailam ta sinam kumba atrau piro yimyam kumba minnaig.

⁷ Tawi ma ɲgumnemɲge minna ta pris suɲgo ndo nu wande ta sinam kambinu. Mara mara kuga. Yar ndindo sinamɲge ki ait ndindo ndo nu wande ta sinam kambinu. Nu kambim ɲga agaɲmor ndare kilmba nuɲe mbar, taɲgo pino tuku mbar, mbar afu nane kumba kamus ndanaig ta ɲakmba saukam tuku Kuate atraukanu.

⁸ Maɲau ta mbolɲge Tukul Guwa nu teɲenmba sine tumsɲgit. Ambokok maɲau sinamɲge tukul wande tumailamɲge atrau piro kuga ndawa ta ake taɲgo nu tukul wande suɲgo ɲgumnem ta sinam kumba Kuate tugum kambim kumuɲ kuga.

⁹ Tawi wande ta maɲau kitek te tuku kanunu ndo. Maɲau ta sinamɲge nane Kuate mbariɲam ɲga agaɲ yimyam Kuate tuku patika agaɲmor kilmba bale farmba atrauka taɲamba taɲamba minnaig. Nane taɲanaig ta naɲgine mbar maɲau tuku piti naɲgine wamdus sinamɲge minnaig.

¹⁰ Nane kule le nyamagaɲ tuku tukul ɲgarosu agaɲ ndende minyaɲge likam tuku tukul ta ndo

dubika minnaig. Tukul ŋakmba ta ŋgarosu tuku ndo. Nane tukul kame ta dubika minwaig le Kuate nu maŋau kitek te-mayokuwa le tukul kame ta saŋgri kugawamŋgaig.

¹¹ Nane tukul maŋau dubika minnaig le ta ŋgamukŋge Kuate tugumŋge ŋgamuŋgal mukuk ŋak minam tuku maŋau prona. Kristus nu pro maŋau ta tuku pris sungo mayok kina. Nu Kuate tuku wande sinam kumba ka pris sungo piro biyit ta kilke mbolok wande kuga. Samba mbolok wande tugusek. Tanŋonŋe pile ndakinaig tuku.

¹² Nu wande ta tuku tukul wande sungo nduiye sinam kina. Nu pris sungo ambokok taŋaŋ meme le makau fat tuku ndare kilmba tukul wande sungo sinam kine ndakina. Nu nuŋe ndare tumba ka ndare tambi sine piyasiŋmba sine tuku muskil nduiye kile-tidiŋgina.

¹³ Maŋau ambokok dubimba nane meme le makau pailnu tuku ndare kilmba makau paŋgar fatnu pasokinaig tuku kuke tugu ta tur mbilmba taŋgo nu wam afu mbolŋge kutur kilanu ta nane mbolŋge bareŋniŋginaig. Bareŋniŋginaig le naŋgine ŋgarosu tuku kutur saukinaig.

¹⁴ Kristus tuku ndarenŋe agaŋmor ndare tuku piro lite. Nu purfeŋnu ndo minmba nuŋe minmba minam tuku maŋau tuku saŋgri mbolŋge nuŋe ŋgarosu kumam tuku pilmba Kuate atraukina. Wam afu dubikeg le tur ndasiŋgig le wamduŋ piti ŋak mineg ta nuŋe ndarembi mbar ta ŋakmba sauke suluwa le sine ŋgamuŋgal mukuk ŋak Kuate mbariŋam kumuŋ.

¹⁵ Pasa kitek Kuate katna ta kile Kristus nu alonu kile-mayokkate. Nu tuku kume mbolŋge pasa

ambonga katna ta kumnemnge minmba mbarde mbal muskil kile-tidinge ningit. Kile Kuate nu o buk sakina tanjamba nu wikade mbal njakmba nuje wam magenu kilam tuku minig.

16 Tango ande ngumnenga ye kumi le ye tuku aganj ndende yije mbalnge kilam tuku nga idusmba nu waje ande kuyarmba pilit. Tango ta nu kumit le ndo nu tuku aganj ndende kuembol walmba kilig.

17 Nu nuje pasa kuyarte sulumba nu abo minit ta kuyar ta alo kugatok tananj minit. Nu kumit le ndo alonu mayok kinit.

18 Wam ndui ta ndo Kuate nu pasa o buk tango ndonj katna ta alonu mayok kuwa nga tane aganjmor bale farap ngina. Ndare tamba pasa katna ta tugu pilnaig ta tenenmba.

19 Moses nu tukul pasa njakmba tango pino saningina sulumba nu makau fat le meme tuku ndare kilmba kule tur mbilna. Tanjamba nu sip-sip nguenu gurgur kilmba hisop ail wanjenu tur kusmba pilna le ndare sinam kina. Kina le tumba barejna le tukul kuyaranu waje tango turmba mbol kinaig.

20 Tanjamba Moses ndek sakina: Tane dubikam tuku Kuate nu tane ndonj pasa katna ta ndare tembi tugu pilit ngina.

21 Nu wam kina tanjamba ndo ndare ta tumba ka tawi wande sinamnge Kuate atraukam tuku aganj ndende njakmba mbolnge barejningina.

22 Moses tuku tukul manjau ta sinamnge kutur njakmba mayok kinaig ta ndarembi ndo saukinaig. Ndare kutu ndate ta tango tuku une sau ndakate.

Yesus nu kumba sine tuku une saukina

²³⁻²⁴ Maṅau ambokok sinamṅe nane agaṅmor ndarembi kutur saukinaig. Maṅau ambokok ta samba mbolok maṅau kube ndo naig. Kristus nu kilke te mbolok tuku tukul wande sinam kine ndakina. Nu samba mbolok tuku wande tugusek ta sinam kina sulumba kile sine turkam tuku Ku-ate tugumṅe minit. Ta tuku samba mbolok agaṅ ndende agaṅmor ndarembi kutur saukam kumuṅ kuga. Atrau agaṅ purfeṅnumbi ndo kutur saukam kumuṅ.

²⁵ O buk yar kidemba ki ait ndindo mbolṅe pris sunṅo nu tukul wande sunṅo sinam kambim ṅga nuṅe ndare tumba kine ndakina. Nu agaṅmor ndare kilmba kambinu. Kristus nu taṅa ndana. Nu nuṅe ṅgarosu kumam tuku palmbim nduina sulumba nuṅe ndare tumba samba mbolok tukul wande sinam kina.

²⁶ Nu wam ta ke ndakina kande Kuate nu kilke te-mayokna ait ta mbolṅe nu tugu pilmba kume tutur-tuturmba ka kile taṅamba minit kande. Ait kugawam tuku ait te mbolṅe nu mayok kina sulumba nuṅe ṅgarosu tambu une ṅakmba sauke suluwam tuku Kuate atraukam nduina.

²⁷ Taṅgo ṅakmba kume nduiwaig sulumba Kuate nu nane pileniṅgam tuku ait tairṅga minamṅaig.

²⁸ Taṅamba ndo Kristus nu nuṅe ṅgarosu pilna le nane nu balenaig le nu kumam nduina sulumba taṅgo gudomma tuku une saukina. Nu maṅ luka prowamṅat ta une saukam tuku prowe nda. Sine nu minde mineg mbal sine tuku muskil kile-tidiṅge singam tuku prowamṅat.

10

¹ Tukul maṅaunḡe samba mbolok tuku tugusek maṅau tuku alonu kile-mayok ndakate. Nu wam tugusek tuku kanunu ndo. Ta tuku nane tukul dubimba yar kidemba aḡaṅmor ndui ta ndo kilmba bale farmba atrauka Kuate am mbolḡe kumumbi mayok kine ndakade.

² Nane kumumbi mayok kinaig kande nane une tuku piti kamus ndamba aḡaṅmor maṅ kilmba bale farmba atrau ndakinaig kande.

³ Nane yar kidemba une saukam tuku aḡaṅmor kilmba bale farniṅmba atraukinaig sulumba naṅine une ta idusmba minanu.

⁴ Makau pailnu le meme tuku ndarembi une saukam kumuḡ kuga.

⁵ Ta tuku Kristus nu kilke te mbol prona sulumba nu Kuate sana:

Nane aḡaṅmor kilmba bale farmba aḡaṅ kise kise ne tanmbim tuku patikade wam ta ḡakmba ne nzali ndanate. Ta tuku ne ye ḡgarosu te sina.

⁶ Nane aḡaṅmor kilmba bale farmba ḡak pasokade ko naṅine une idusmba aḡaṅmor bale farmba atraukade wam ta ḡakmba ne nda nzalinate.

⁷ Ta tuku ye ne sanamḡit. Kuyar pasa ye tuku taṅamba sakate ta ye prowen te ne tuku nzali ḡakmba dubikam tuku minet. *Mune 40.6-8*

Kristus nu taṅamba Kuate sana.

⁸ Kristus tuku pasa ta tugunu teṅenmba. Nu ambonḡa sakina: Aḡaṅmor kilmba bale farmba aḡaṅ kise kise ne tanmbim tuku patikade wam ta

ne nzali ndanate. Ağanmor kilmba bale farmba ḡak pasokade ko afu nanḡine une tuku atraukade maḡau ta ḡakmba ne nda nzalinate ḡgina. Nane tukul maḡau dubimba maḡau ḡakmba ta kinaig ta

⁹ Kristus nu maḡ pasa tuturmba sakina: Ye prowen te ne tuku nzali ḡakmba dubikam tuku minet ḡgina. Nu maḡau kitek Kuate tuku nzali ḡakmba dubikam tuku ta mayok kuwa ḡga tukul maḡau tuku piro te-sina.

¹⁰ Kristus nu Kuate tuku nzali ta dubimba nuḡe ḡgarosumbi Kuate atraukam nduina. Taḡana le Ku-ate tuku nzali mayok ka Yesus Kristus tuku kume mbolḡe sine nu am mbolḡe kumumbi mayok kageḡ.

¹¹ Tukul maḡau mbolḡe pris mbal nane tawi wande sinamḡe mara mindek taḡe piroka tiḡ minig. Nane ağanmor ndui ta ndo kilmba bale farmba atraukade ta ağanmor ndarenuḡe taḡo tuku une saukam kumuḡ kuga.

¹² Kristus nu taḡo tuku une saukam tuku nu nuḡe ḡgarosu kumam tuku pilmba Kuate atraukam nduina. Nu tuku atrau aḡaḡ une saukam tuku saḡri minmba minamḡat. Nu taḡana sulumba nu Kuate tuku ndinam kumamḡe minyoka

¹³ Kuate nu nuḡe ḡgueu mbal ḡakmba kile-ibenḡka nu kumnemḡe patikam tuku tairḡga minit.

¹⁴ Nu nuḡe ḡgarosu atraukam nduina le sine nu mbolḡe purfenḡu mayok kineg mbal Kuate am mbolḡe kumumbi minmba minamḡig.

¹⁵ Tukul Guwa nu wam ndui ta ndo tumsingit. Nu ambonḡa teḡenmba sakina.

16 Ye Sunḡo ye sakamḡgit. Ait ande prowa le ye pasa kitek teḡemba Israel mbal ndoḡ katamḡgit. Ye yiḡe tukul pasa ḡakmba nane dubi magekam tuku nane tuku ḡgamuḡgal sinamḡge patike likamḡgit ḡgina. *Yeremia 31.33*

17 Tukul Guwa nu lato maḡ teḡemba sakina. Ye nane tuku une wam ḡaigonu ḡakmba gilainḡgamḡgit ḡgina. *Yeremia 31.34*

18 Kuate nu sine tuku une ḡakmba sauka gilainḡgina tukunu une saukam tuku atrau aḡaḡ nu piro ku-gatok minit.

Sine Kuate tugum kab

19 Tira kame, Yesus nu nuḡe ndarembi sine tuku une ḡakmba sauke suglukina. Ta tuku kile sine kuru kuru ndaka ḡgaro bulok samba mbolok tukul wande sunḡo sinam kumba Kuate tugum kab.

20 Sine Kuate tugum kambim tuku Yesus nu nuḡe ḡgarosu atrauka ndin kitek wakeina. Ndin ta abo ḡak minmba minam tuku.

21 Nu pris sunḡo mayok ka sine Kuate tuku mbal kulatkate.

22 Nu sinḡine mbar tuku piti sauke sulumba kule purfeḡnumbi sine tuku ḡgarosu ḡakmba minyaḡgina. Ta tuku sine wamdus ndindo tumba Kristus tuku sanḡri tomba tinḡa ḡgarosu bulok Kuate tugum kab.

23 Sine nu tuku pasa tuku alonu tairḡga mineḡ ta kusre ndamba biye debe. Kuate nu sinḡka nuḡe pasa dubimba sinḡine muskil kile-tidinḡe sinḡamḡgat.

24 Sine tira kame nane afu ḡgamuḡgal ninḡam tuku afu mbolḡge maḡau magenu ke likam tuku sinḡine sinḡine ḡgamuḡgal kuagnekube.

25 Singine mbal afu Kuate mbariŋam tuku maŋgur ndakade ta sine taŋa ndabe. Sine maŋgurka singine singine tira ndoŋ muŋgu saŋgri pileniŋbe. Sungo prowam tuku ait buk patukate. Ta tuku sine mara mara maŋgurkube.

Kristus ŋgumnewam tuku maŋau

26 Sine Kuate tuku pasa tugusek ismba kila pilmba singine nzali ndo dubimba wam ŋaigonu kumba mineg ta atrau agaŋ ande une saukam tuku mine ndakate.

27 Sine taŋamba mineg ta sine pilesingam tuku ait Kuate nuŋe ŋgueu mbal kilmba pa kame ŋayo mbol pankamŋgat ta tairŋga minbe.

28 Taŋgo ande nu Moses tuku tukul pasa ande ake agaŋ taŋaŋ ŋga lukamba likina ta taŋgo armba ko keŋmba nu kaŋgermba nu tumba ka pasa mbolŋge te-timba nu mape ndamba balewanu.

29 Ande nu Kuate tuku Kiŋo ŋgumnete ta siŋka nu ŋgaro mukuk mine nda. Yesus nuŋe ndare kuta le Kuate nu pasa kitek katna ta alonu mayok kina. Nane ndare ta ake agaŋ ŋgade ta ndare ta mbolŋge ndo nane purfeŋnu mayok kambim tuku nu kumna. Tukul Guwa nu nane ake sinaŋ make patikam iduste ta nane nu tumail pande. Mbal ta nane siŋka pa sungo tam tuku minig.

30 Kuate nu pasa teŋenmba sakina: Maŋau ŋaigonu lafunu ta ye tuku piro. Yeŋge pa niŋgamŋgit ŋgina ta sine ŋakmba kila. Nu lato pasa ande mata sakina: Ye Sungo. Ye yiŋe mbal ŋakmba pileniŋgamŋgit ŋgina.

³¹ Ande nu Kuate minmba minit nu tuku pa kanjerwa sulumba ose. Nu kuru kuru sunjo tamngat.

Sine sangri tinga dirnanjube

³² Ambonga bulu mayenu tane tugum prona le tane piti sugo afu pronaig ta tane sangri tinga dirnanja minnaig.

³³ Nane tane kilmba tanjo am mbolnge kiletidinga piti sugo tinmba tane tumail pantinginaig. Mara afu tangine tira afu mbolnge tanjanaig ta tane kuru kuru ndaka nane ndonj ulendikinaig.

³⁴ Nane afu mulinj kilanu minnaig ta tane nane ndonj piti kuranaig. Nane afunje tane tuku aganj ndende ake kilmba njaigo siglikinaig ta tane ta tuku wamdus piti sunjo nda tinaig. Aganj kame ta kilke te tuku aganj ndo nga tangine samba mbolok aganj ndende magenu minmba minam tuku ta idus tidinginaig. Tangine manjau mayenu ta gilai ndanjap.

³⁵ Tane sangri tinga dirnanja tanjamba ndo minap ma ma lafu mayenu tamnngaig.

³⁶ Manjau tambu ndo Kuate tuku nzali njakmba dubikap sulumba wam mayenu prowamngat nga sakina ta tamnngaig.

³⁷ Kuate tuku pasa te tane isap. Ande prowamngat ta nu dalke nda. Mine minemba prowamngat.

³⁸ Yinje tanjo tinreknu nu ye ndo idusyumba ye kumunj nga saka minwa. Nu kuru-kuruka lukuwa ta ye nu nzaliwe nda. *Habakuk 2.3-4*

Kuate tuku kuyar pasa tanjamba sakate.

³⁹ Tira kame, afu kuru-kuruka luka ngisikade ta sine nane taŋaŋ kuga. Sine Kuate tala ndamba nu kumuŋ nga abo ŋak minmba minam tuku mbal mineg. Ngisike nda.

11

Kuate tuku saŋgri tomba tiŋgam tuku mbal

¹ Sine Kuate tuku saŋgri tomba tiŋgeg wam ta tugunu teŋenmba. Sine wam kame tairŋga mineg ta siŋka kilamŋgig ŋgeg. Agaŋ ndende ammbi kaŋger ndakeg ta sonndo minig nga ŋgamuŋgalmbi iduseg.

² Siŋgine mbuŋ kame nane maŋau ndui ta ŋak minnaig le Kuate nu nane tuku gare ŋak nyu sugo niŋgina.

³ Sine Kuate kumuŋ nga sakeg ta nuŋe pasambi samba kilke kile-mayokkina ta sine kila. Sine agaŋ ndende ammbi kaŋgerkeg te nu agaŋ ammbi kaŋger ndakeg tamba nu kile-mayokkina ŋgeg.

⁴ Abel nu Kuate tuku saŋgri tomba tiŋga agaŋmor tumba atraukina. Atrau agaŋ taŋge Kain tuku atrau agaŋ lina. Kuate nu Abel tuku atrau ta kaŋgermba nzalina le nu taŋgo tiŋreknu nga nu tuku nyu te-mayokna. Nu o buk kumna ta nuŋe maŋau mayenu taŋge sine tumsiŋmba minit.

⁵ Enok nu Kuate tuku saŋgri tomba tiŋgina ta nu kume ndakina. Kuatenge nu ŋgarosu ŋak tina le afu nu tuku mindesiŋ kaŋgeram tuku sotete piŋsiŋginaig. Kuate nu Enok nda tina sulumba nu tuku gare suŋgo tina. Kuyar pasa taŋamba nu tuku sakate.

⁶ Ande nu Kuate talate ta nu Kuate gare tambim kumuŋ kuga. Ta tuku ande nu Kuate tugum kambim nga Kuate nu siŋka minit nguwa. Ne nu sota le nu ne mbolŋge wam mayenu kamŋgat nga idusa.

⁷ Kuate nu wam ngumneŋga prowam tuku Noa rironŋ pasa sana ta nu ismba Kuate tuku pasa son nga nu nuŋe ndare mage minam tuku waŋ ande kusna. Noa tuku maŋau tanŋe kilke mbolok mbal tuku maŋau ŋayonu kilimok te-mayokna. Kuate nu kumuŋ ŋgina ta nu am mbolŋge kumumbi mayok kina.

⁸ Kuate nu Abraham nuŋe ma kusremba ma kise ande tambim tuku sana le nu Kuate tuku sanŋri tomba tinŋa nuŋe ma kusremba kina. Ma nu kambim tuku ta nu gilai. Ake tinŋa kina.

⁹ Kuate nu ma tambim tuku sakina ta mbol prona sulumba nu Isak le Yakob ndoŋ rawe tanŋo tanŋan minmba baibai ndo patikinaig. Abraham Kuate nu kumuŋ nga ma tam tuku wamdus bulok tairŋga minna.

¹⁰ Kuate nu samba mbolŋge tumbraŋ mayenu minmba minam tuku pilna ta Abraham nu tumbraŋ ta ndo idusmba wamdus bulok ŋak tairŋga minna.

¹¹ Kuate nu pasa sanŋrinu sakina le Abraham piyo nuŋe Sara nu ismba Kuate nu kumuŋ ŋgina. Ta tuku nu saibo pile mayemba kiŋo tam tuku ait lina ta nu kiŋo konna le sanŋri tinŋa funŋulok minna. Kuate nu siŋka nuŋe pasa kumuwaŋgat nga nu tanŋana.

¹² Wam ta mbolŋge tanŋo ndindo ta saibo pile mayemba kumam tuku ait patukina le nu tuku mbuŋ gudommba mayok kinaig. Samba mbolŋge

mbai minig piyalnge fulbul minig tanaŋ burnu kumuŋ kuga.

¹³ Abraham nane Kuate tuku pasa ismba nu kumuŋ nga saka minnaig ma ma alonu kaŋger ndamba kume likinaig. Nane pasa ndo ismba ngumneŋga alonu prowamngat nga nane kila minmba gare ŋak kume likinaig. Nane kilke te mbolnge minmba sine rawe tango tanaŋ mineg nginaig. Siŋine tumbranŋ tuguk kilke te mbolnge mine ndakate nga saka minnaig.

¹⁴ Tanaŋa sakinaig mbal ta nane tumbranŋ ande minam tuku sota wamdus te-mayoknaig.

¹⁵ Naŋgine tumbranŋ o buk kusrenaig ta luka kambim kumuŋ ta nane tumbranŋ ta idus ndanaig.

¹⁶ Nane ma kise mayenu ndo sota minnaig. Ma ta samba mbolok. Nane Kuate nu sine tuku Mbara nginaig le nu nane tuku nyu yabu ndaka samba mbolnge tumbranŋ ta kuaneke niŋgina.

¹⁷⁻¹⁸ Kuate nu nuŋe kiŋo Isak tuku teŋenmba Abraham sana: Isak mbolnge ndo ne tuku mbuŋ mayok kaŋgaig nga sana. Nu Abraham tuku ngamuŋgal son tagona le nu Kuate tuku saŋgri tomba tiŋga nuŋe kiŋo ndindo balemba luka Kuate atraukam bafuna.

¹⁹ Nu teŋenmba idusna: Isak nu kumwa ta Kuate nu te-tiwamngat ngina. Ta tuku Isak nu kume ndakina ta nu kumanu tanaŋ mam nuŋe nu maŋ luka tina.

²⁰ Isak nu Kuate nu kumuŋ nga nuŋe kiŋo armba Jakob le Esau wam ngumneŋga mayok kaŋgaig ta tuku nyaro pasa nikina.

²¹ Jakob nu minmba ka kumam bafuna sulumba Kuate nu kumuŋ nga nu nuŋe wa kame

Yosef tuku kiŋo armba wam ngumneŋga mayok kaŋgaig ta tuku nyaro pasa nikina. Nu nuŋe ndumndum biymba tamba ngaro saŋgri pilemba loka Kuate tuku nyu te-dunŋa nu nale nyaro pasa nikina.

²² Yosef nu minmba ka kumam bafuna sulumba Kuate nu kumuŋ nga Israel mbal Isip kusrewam tuku saningina: Tane Isip kusremba ye tuku isu kilmba kumba taŋgine ma kitek mboŋge ngukap ngina.

²³ Ngumneŋga Moses tuku ina mam nu te-pilmba kiŋo mayenu nga Kuate tuku saŋgri tomba tiŋga Farao tuku tukul pasa kuru kuru ndaka nu yubeŋginaik le tambun keŋmba minna.

²⁴ Moses nu suŋgokina sulumba Kuate nu kumuŋ nga nu Farao tuku wa nga nyu suŋgo tunaig wam ta ngumnena.

²⁵ Kilke te tuku nzali ŋaigonu ait fagnu ndo minam tuku ta ngumneningina sulumba Kuate tuku mbal sinamanzer suŋgo minnaig ta nane ndoŋ ulendikina.

²⁶ Nu Isip mbal tuku agaŋ ndende magenu kilam tuku ta agaŋ ŋai fudiŋndo taŋaŋ nga mbulmba pitaikina. Nu afuŋge tumail pannaig ta nu Kristus tuku idusmba ngamuŋgal mukuk ŋak minna.

²⁷ Nu Kuate tuku saŋgri tomba tiŋga Farao tuku gubra kaŋgermba kuru kuru ndaka saŋgri tiŋga Isip kusrena. Sine siŋgine ammbi Kuate kaŋgeram kumuŋ kuga ta Moses nu Kuate kaŋgeranu taŋaŋ saŋgri tiŋga minna.

²⁸ Kuate nu kumuŋ nga nu Pasowa ait suŋgo tugu pilmba kame eŋel nu Israel mbal tuku kiŋo mulum mapeka bale far ndakuwa nga nu

nane saningina le nane sipsip baleniŋmba ndarenu kilmba nanjine wande malanŋa pisneniŋginaig.

²⁹ Israel mbal nane Kuate nu kumuŋ ŋga Yu Gur-gur ŋgamuŋge bablakina le sim kinaig. Isip mbal nane mata sim kambim tuku tagomba kinaig ta nane ŋakmba ŋgisikinaig.

³⁰ Ngumneŋga Israel mbal Kuate nu kumuŋ ŋga Yeriko tumbraŋ mara 7 laipnaig le ndame fonde sambrika guroronaig.

³¹ Yerikonu pino Rahab tanŋo didik farmba minna tuku ta nu Kuate kumuŋ ŋga Israel tanŋo armba tumbraŋ ta katesewam pronaik le nu nale turka yubengina. Ta tuku nuŋe ŋgueu mbal kame pronaig ta nane Yeriko mbal ŋakmba bale farka nu mapemba bale ndanaig.

³² Ye nane gudommba tuku wam kubewam kumuŋ. Gideon Barak Samson Yefta David Samuel tuan tanŋo ŋakmba satinŋam tuku ta ye ait kuga.

³³ Mbal ta nane ŋakmba Kuate nu kumuŋ ŋga tejenmba ke likinaig. Afu nane kilke kisekok mbal ndon kame bumba nane kile-ibenjinaig. Afu sanŋri tinŋa manau tinreknu ndo mayok kambim tuku pirokinaig. Afu Kuate nu nane mbolŋge wam magenu kam tuku saningina ta alonu tinaig. Afu nane laion tuku miŋge tukulninginaig.

³⁴ Nane afu pa sunŋo sinamuŋge patikinaig ta kume ndakinaig. Afu nanjine ŋgueu mbalŋge bagimbi bale faram bafunaig ta nane sanŋri tinŋa kua kinaig. Afu sanŋri kugatok ta Kuate tuku sanŋri mbolŋge sanŋri tinŋinaig. Nane kame buwam tuku sanŋri tinaig le kilke kisekok mbal nane kua kinaig.

35 Pino afu nanjine kutu kummba man abonjinaig le kilnaig.

Kuate tuku sanjri tomba tinjinaig mbal afu piti yimyam kanjerkinaig. Nane afunje nane Kuate kusrewaig nga ngarosu rar sunjo ninjinaig le abo tugu kitek tam tuku saka Kuate kusre ndamba rar sunjo kamusmba ma ma kume likinaig.

36 Afu kilmba amseseninjmba muli karenjnumbi ngusninge likinaig. Afu mulinj kilmba wandeknje patikinaig.

37-38 Nane afu ndamembi bale farninjinaig. Afu so sunjombi ngamunje kat pugurkinaig. Afu kame bagimbi bale farninjinaig. Kuate tuku mbal ta sipsip ko meme tuku ngaro fulka tinje lika minnaig. Nane piti yimyam kilmba kua ka ma baknu mbolnje tabe pon pilemba ndame burok ko kilke burok sinamnje nane kuirka sinamanzer sunjo tumba mine likinaig. Kuate tuku mbal ta nane kilke mbolok mbal ndonj ulendikam mbulnaig.

39 Nane njakmba Kuate nu kumu nj nga dirnanga saka minnaig ta Kuate nu nane tuku gare njak nyu sugo ninjina. Kuate nu wam mayenu kam tuku sakina ta nane alonu kanjer ndanaig.

40 Ta ndanam? Kuate nu sine tuku ait mbolnje wam mayenu te-mayokam tuku idusmba nane sine tairnguwaig le sine kumu kumu muskil kiletidnje sinjamngat.

12

1 Sine nane Kuate tuku sanjri tomba tinjinaig mbal ta tuku manau mayenu ta idusninjmba sinjine nzali yimyam njgumneninjmba ame unenje sine

didikate ta kusreka sine taŋgo kame usre mbolŋge dirnanŋa pinderka piya mayenu tam idusde taŋaŋ
² siŋgine wamdus Yesus ndo idus timba minbe. Sine ŋgamuŋgal son teg ta Yesus mbolŋge teg. Teg le ka saŋgri tiŋgate ta nuŋge saŋgri pilete. Yesus nu ŋgumneŋga gare suŋgo tam tuku idusmba ail kazrai tuku kume kiko suŋgo ta taŋaig ŋga kuraamba kumna. Kummba tiŋgina sulumba kile nu Kuate tuku ndinam kumamŋge nyu suŋgo ŋak minit.

³ Mbal ŋaigonu nane Yesus kasurmba nu tuku nyu ŋayo silinaig ta nuŋe saŋgri kusremba baklel ndana. Tane Yesus tuku maŋau ta idusmba taŋgine saŋgri tiŋgade wam ta kusreka baklel ndawap.

⁴ Tane maŋau tiŋreknu dubiwam tuku saŋgri tiŋgade le afuŋge wam ta tuku tane kilmba bale far ndade.

⁵ Kuate nu pasa ande tane piti sinamŋge saŋgri tiŋgam tuku sakina ta tane gilaiŋgade ŋga iduset. Kuate nu tane nuŋe kiŋo kame tuku teŋenmba sakina.

Yiŋe kiŋo, ye ne te-tinam tuku pa tinet ta talaka nda isanu sukmba mine ndaka.

Ye ne sane liket ta saŋgri kusremba baklel ndawa.

⁶ Ye Suŋgo. Ye teŋenmba ket. Ye ande tuku kume purmba minet ta ye nu te-tiwam tuku pa tuwet.

Ande nu yiŋe kiŋo ŋga tet ta nu mayenu mayok kambim tuku ye nu ŋguset. *Sindaun 3.11-12*
 Kuate nu taŋamba sakina.

⁷ Tane Kuate tuku pa kamusde ta nu sine kile-tidiŋgam tuku taŋate ŋga saŋgri tiŋgap. Tane Kuate

tuku kiŋo kame minig sulumba nu tuku pa kamusde. Kiŋo ima nu mam nuŋe tuku pa kamus ndate?

⁸ Kuate nu nuŋe kiŋo kame kile-tidingam tuku pa niŋgit. Tane nu tuku pa kamus ndawap ta tane nu tuku kiŋo kame nda minig. Tane ma ŋgamukok kiŋo kame taŋaŋ minig.

⁹ Singine kilke mbolok mam kame nane sine kile-tidingam tuku pa siŋginaig ta nane kumumbi kade ŋga nane kumnemŋe mingenj. Singine samba mbolok Mam nu singine kanu kulatkate sine pa siŋgit ta sine siŋka wamdus bulok ŋak nu kumnemŋe minbe. Ta mbolŋe sine mine mayenu tamŋgig.

¹⁰ Sine kiŋo kame mingenj le singine mam kame sine kile-tidingam tuku naŋgine wamdus fagnu tambi pa siŋginaig. Singine Mam Kuate sine nu ndoŋ purfeŋnu tuma minbe ŋga wam mayenu ta tam tuku nu pa siŋgit.

¹¹ Singine Mam sine pa sunjo siŋgit le ta sinamŋe sine gare kugatok ŋgamuŋgal rar ŋak mineg ta ima nu pa ta mbolŋe saŋgri tiŋgate ta ŋgumneŋga nu alonu kaŋgerka nu wamdus bulok ŋak minamŋgat.

¹² Ta tuku tane pa ta kamusmba baklel ndaka saŋgri tiŋgap.

¹³ Tane wamdus saŋgrinu pilmba maŋau tiŋreknu ndo ke likap. Taŋawap le tane tuku afu saŋgri kugatok ta nane saŋgri tiŋgamŋgaig.

¹⁴ Taŋo ŋakmba ndoŋ wamdus bafumbi minam tuku wamdus saŋgrimba palpe. Tane tiŋreknu mayok kambim tuku wamdus ndindo pilmba dirnaŋgap. Ande nu tiŋreknu mayok ndakuwa ta

nu Sunḡo kaḡgere nda.

¹⁵ Tane kurau mayewap. Kuate nu ake sinan taḡgo make patikate wam ta ande nu liwikat. Ko tane tuku ande wamdus ḡgueu ḡak mayok ka tane ḡakmba ḡaigo siglikuwa le tane kutur tubekaig.

¹⁶ Tane kurau mayewap. Ande nu fare fare pino kame ndoḡ unekumba minikat. Ko ande nu Esau taḡaḡ Kuate tuku wam ake agaḡ taḡaḡ ḡga bukuḡgikat. Esau nu kiḡo mulum tukunu mam nuḡeḡge Kuate tuku nyaro pasa nu tambim tuku minna. Ait ande mbolḡge nu gubana le nyamagaḡ piyanu mambo nuḡe nyaro pasa ta tuna.

¹⁷ ḡgumneḡga nu nyaro pasa bukuḡgina ta luka tam tuku nu malmbi sunḡo tumba mam nuḡe kusnana kande nu tambim kumuḡ kuga. Nu maḡ ḡgamuḡgal biye mbilam tuku ndin kirinḡgina. Tane ḡakmba Esau tuku wam ta kila.

Sine samba mbolok agaḡ ndende tugum proweg

¹⁸ Israel mbal o buk Sinai tabe tugum promba naḡgine ammbi agaḡ ndende kaḡgerkinaig. Tabe ta mbolḡge pa bulu sunḡo mayok ka ma furir sunḡo ndeka bubre sanḡri ḡayo tiḡga minna.

¹⁹ Ta sinamuḡge tabil sinḡon sunḡo mayok ka Kuate tuku miḡge pasa ande prona le taḡgo pino nane pasa ta ismba kuru kuru sunḡo tumba Moses sarsamba sanaig: Sine pasa ta lato isam mbulig ḡginaig.

²⁰ Kuate nu riroḡ pasa ande teḡenmba sakina: Agaḡmor ko taḡgo tabe te tugum prowa kande mape ndamba ndamembi balewap ḡgina.

²¹ Wam mayok kinaig ta nane kanjerka kuru kuru sunjo tinaig le Moses nu mata sakina: Ye kuru kuru sunjo tumba isu piririwet nga sakina.

²² Tane pasa kitek sinamnge minig mbal tabe ta tugum pro ndade. Kuga. Tane Kuate abo tugu minmba minit nu tuku tumbran Sion tabe tugum prode. Tumbran sunjo ta Yerusalem kitek samba mbolnge minit. Tumbran ta sinamnge enjel gudommba manjur sunjo pilmba gare-gareka minig.

²³ Mbal afu Kuate tuku kiyo kame ambonga mayok kinaig nu samba mbolnge nane tuku nyu kuyarkina ta nane mata tanje manjurkade. Kuate nu tanjo nakmba pilesingit ta nu mata tanje minit. Nane Kuate tuku mbal tinreknu buk kumumbi mayok kine likinaig ta nane tuku kanu mata minig.

²⁴ Yesus nu mata tumbran ta mbolnge minit. Kuate nu pasa sangrinu kitek katna ta nunge alonu kile-mayokkate. Nunje ndare kutuna tanje Abel tuku ndare witina ta lite.

²⁵ Ta tuku tane kurau mayewap. Ande nu pasa tumsingit ta tane pitaibekaig. Moses nu kilke te mbolnge Kuate tuku riron pasa saningina ta ande nu ismba nda isanu sukmba pitaiwa ta nu pa tamngat. Kile Yesus nu samba mbolnge riron pasa sasingit ta ande nu pasa ta nda isanu sukmba pitaiwa ta nu pa sunjo te nda nga iduste e?

²⁶ O buk Kuate nu Sinai tabe mbolnge nunje pasa Moses ndon katna le kilke te buru-burukina. Kile nu pasa sangrinu sakate: Ye kilke man nduiye buru-buruwamngit. Kilke ndo kuga. Samba turmba buru-buruwamngit ngate.

²⁷ Kuate nu ye maŋ nduiye buru-buruwamŋgit ŋgate ta tugunu teŋenmba. Nu agaŋ ndende kile-mayokkina te buru-buruninguwa le ŋakmba ŋgisikamŋgaig. Agaŋ ndende buru buru ndakuwaig ta ndo kilmba patikuwa le minmba minamŋgaig.

²⁸ Sine Kuate tuku gageu mayok kageŋ mbal siŋgine tumbraŋ tugusek samba mbolŋge buru-buruke nda. Ta tuku sine Kuate tuku gare pasa tube sulumba nu kuru-kuruka nu kumnemŋge minmba nu tuku nyu te-duŋgube. Mbariŋ maŋau ta nu nzalite.

²⁹ Siŋgine Mbara pa suŋgo tiglu ŋakmba pasokate taŋaŋ minit.

13

Kuate gare tambim tuku maŋau

¹ Taŋgine tira mbal ŋgamuŋgal muŋgu niŋge-niŋgekam tuku maŋau kusre ndawap.

² Mbal afu ma kisekok tane tugum prowaig kande tane nane kulat magekap. Nane afu buk taŋanaig ta nane eŋel kame kulatkinaig ta nane katese ndanaig.

³ Tane tuku afu muli wandekŋge minig ta tane nane ninanka nane ndoŋ piti tuma kurawanu taŋaŋ minap. Ko afuŋge tane tuku afu rar niŋgig ta nane mata ninanka nane ndoŋ rar tuma kamu-sanu taŋaŋ minap. Tane mata piti ndui ta kile-siglikubekaig.

⁴ Pino taŋgo ndoŋ muŋgu kilik maŋau mayenu ta ake agaŋ ŋga idus ndamba kurau mayewap. Ande nu maŋau ta purte ta nu mbar suŋgote. Pino taŋgo

ɲak ko mbazonu kuayarde mbal Kuate nu nane ɲakmba pileniŋgamɲgat.

⁵ Tane ndametiŋ kilam tuku piriri ndawap. Tane aŋaŋ ndende ɲak minig ta te kumuŋ ɲga idusap. Kuate nu teŋenmba sakina: Ait ɲakmba mbolŋge ye ne ndoŋ minmba kusrene nda ɲgina.

⁶ Ta tuku sine Kuate tuku pasa ta idusmba sine miŋge bulokmbi teŋenmba sakube.

O Sunŋo, ne mara mara kumumbi ye turyate.

Ta tuku ye taŋgo tuku ɲgueu maŋau kuru kuru ndaket.

Mune 118.6

Sine taŋamba sakube.

⁷ Taŋgine gabat kame Kuate tuku pasa mayenu tumsiŋginaig ta nane Kuate biye demba minnaig ma ma kume likinaig. Nane Kuate tuku saŋgri tomba tiŋginaig wam ta idusmba kubewap.

⁸ Yesus Kristus mbilka kise mayok kine nda. Nu buk minna kile minit ɲgumneŋga ndui ta ndo minmba minamɲgat.

⁹ Tane rironɲkap. Nane afunŋe wam pagu pasa kise tumtiŋguwaig le tane nane dubikubekaig. Nane nyamagaŋ tuku tukul ndo dubikam tuku tumtiŋgig. Maŋau ta dubide mbal maŋau taŋge nane tur ndakate. Kuate nu sine ake sinaŋ make patikate wam taŋge siŋgine ɲgamuŋgal saŋgri pilete.

¹⁰ Sine atrau mbain kitek ɲak. Nane kilke te mbolok tawi wande tuku maŋau dubide mbal siŋgine atrau mbain kitek ta mbolŋge nyamagaŋ tumba nyam tuku nyu kugatok.

¹¹ Israel mbal tuku pris sunŋo nu aŋaŋmor tuku ndare kilmba taŋgo pino tuku une saukam tuku nu tukul wande sunŋo sinam kina. Nane aŋaŋmor

ta ndemnu njakmba kilmba tumbran sunjo kusremba kilimnje pasokinaig.

12 Wam ndui ta ndo Yesus mbol prona. Nane nu tumba ka Yerusalem tumbran sunjo kilimnje rar sunjo tumba ail kazrai mbolnje balenaig le kumna. Kummba nuje ndarembi sine tuku une saukina le purfen_{nu} mayok kagenj.

13 Ta tuku sine sinjine manjau yimyam ambokok njakmba kusreka kilim ka Yesus ndonj ulendikube. Sinjine mbal afu talasinjig ta sine piti ta nu kurana tanjamba ndo kurabe.

14 Sine kilke te mbolnje tumbran ande minmba minam tuku mine ndakate. Tumbran sunjo ande Kuate nu te-mayokamngat ta sine mindemba mineg.

15 Ta tuku sine mara mara Yesus tuku nyu tumba Kuate tuku nyu te-dunube. Manjau tambi sine njakmba atrau aganj balemba Kuate atraukanu tananj keg.

16 Nane afu mbolnje wam magenu kam tuku gilai ndangap. Afu nane aganj ndende denkade ta tanjine aganj ndende tambi turkap. Manjau kame ta Kuate am mbolnje atrau aganj mayenumbi atraukanu tananj. Nu kanjermba gare sunjote.

17 Tanjine gabat kame kumnemnje minmba nane tuku wam pagu pasa dubi mayewap. Nane njumnga ka Kuate tugumnje piro ta tuku sakamngaig nga idusmba nane kurauka tane kulat magekade. Tane nane tuku minje dubikade ta nane gare njak tane kulatkade. Nane piti njak pirokade ta piti ta luka tane mbol kanjat.

¹⁸ Sine Kuate am mbolŋge mbar tuku wamduš piti kugatok ŋga iduseg. Sine maŋau tiŋreknu ndo kam tuku matuk tukulkeg. Ta tuku tane sine tuku ŋga Kuate yabaŋap.

¹⁹ Ye pitik tane tugum prowam tuku tane sunġomba Kuate yabaŋap.

²⁰ Yesus nu kumna le Kuate tuku pasa kitek minmba minam tuku katna ta nu tuku ndarembi alonu te-mayokna. Taŋana le Kuate nu Yesus te-tina le nu nyu sunġo tumba Kuate tuku sipsip kulatkanu taŋgo sunġo minit.

²¹ Kuate nu ŋgamuŋgal mukuk miro. Tane nu tuku nzali ndo dubiwam tuku nuŋge wam magenu kumumba tiŋguwa. Tane Yesus Kristus tuku saŋgri tomba tiŋgap le saŋgri taŋge Kuate nu tane tuku ŋgamuŋgal sinamŋge nuŋe nzali ŋakmba kile-mayokkuwa. Yesus Kristus tuku nyu sunġo ta minmba minwa. Son.

²² Yiŋe tira kame, ye pasa kuennu tane tuku kuyar ndawet. Ye tane saŋgri piletiŋgam tuku pasa fagnu kuyaret te tane kilba piŋmba ise mayewap.

²³ Timoteus nu muliŋtinaig ta nu buk mayok kina ta ye tane kila satiŋget. Nu pitik ndo ye tugum te prowa ta ye nu ndoŋ tane tugum prowamŋgik.

²⁴ Taŋgine gabat kame Kuate tuku mbal ŋakmba siŋgine gare pasa te saniŋgap. Taŋgine tira afu Italiŋge minig ta nane mata tane gare pasa tiŋgig.

²⁵ Kuate nu ake sinaŋ tane make patikuwa.
Son.

KUATE TUKU PASA
Portions of the Old Testament and The New Testament
in the Siroi Language of Papua New Guinea
Sampela hap Buk Baibel long tokples Siroi long
Niugini

copyright © 1975, 1999 Wycliffe Bible Translators, Inc.

Language: Siroi

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-02-07

PDF generated using Haiola and XeLaTeX on 18 Apr 2025 from source files dated 31 Aug 2023

9d2e8659-afb4-5cca-93d8-23ebf89e1709